

véiermol 10 Minuten, déi ech zegutt hun, dozou gebrauchen.

Här President. Ech begréissen et, dass endlech méng verschidde Propositions de loi, déi dat aktiivt an dat passivt Walrecht betreffen, op den Ordre du jour vun dësem Plenum kommen.

Virun iwwer engem décke Jor, no der Interpellatioun vun der DP iwwer d'Jugend, hat ech schon de 7. Dezember 1995 eng Proposition de loi betreffend dat passivt Walalter deposéiert, mat der Demande, fir se kënnen an enger nächster Séance publique ze erläutern, wéi dat jo och an eise Reglement virgesinn as.

Ech hat och am November 1995 suggéiert, anlässlich vun der Interpellatioun iwwer d'Jugend, déi d'DP deemools gefrot hat - iwwregens laang ier d'Schüler op d'Strooss hu misse goen - dass ee soll dat aktiivt Walalter op 16 Jor an de Gemengen erofsetzen, an ech hat eng diesbezüglich Proposition envisagéiert.

Den 23. November 1995 hat ech gesot: « Et kënn een op alle Fall an d'Richtung goen, fir fakultativ op Gemengenniveau d'Walrecht fir 16 Jor anzeféieren. » An der Zwëschenzäit hun d'Häre Kollwelter an Zanussi och diesbezüglich Propositionen eragin, mat intensiver Publicity, wéi een dat jo beim Här Kollwelter gewinnt as. Ech wëll awer elo hei keng Diskussioun féieren, wien als éischten wat fir eng Iddi hat. Hei soll et ëm d'Saach goen, dat heescht konkret, ëm eng gesetzlech verankert an demokratesch Matbestëmmung vun dene Jonken an eiser Gesellschaft.

Wann also nach Deputéierten un där Aufgab wëlle schaffen, da begréissen ech dat. Zesummen hu mer da warscheinlech méi Energie a Chancen, fir un eist Zil ze kommen.

Ech kann op alle Fall soen, dass ech scho virun iwwer engem Jor déi Iddien a Propositionen hei an der Châmber lancéiert hat. D'Châmber hat awer virun engem Jor méng Resolutioun, wou et ëm d'Erofsetze vum passivt Walalter op Landesniveau geet, an och d'Diskussioun vun deem Projet am Plenum deemools ofgeleent, well eng Proposition de révision de la Constitution dermat verbonne wir.

Deemools as begrënt gin, ënner anerem vum Här Asselborn, dass een eng Proposition de révision vun der Konstitutioun nët kënn am héijen Haus diskutéieren, well een domat de facto d'Châmber géif opléisen oder dass een dat misst gläichzäiteg maachen. Ouni Verfassungsspezialist ze sin, huet engem dat e bësschen en Nonsens geschéngt. Mëttlerweil schéngt jo och aner Leit déi selwecht Meinung ze hun, well mer iwwer déi Proposition de loi, wou och eng Proposition de révision de la Constitution dran as, hei am Parlament weinstens kënnen diskutéieren.

Ech mengen, dat gët eis elo d'Geleënheet, fir endlech am Parlament iwwer de Sujet Matbestëmmung vun dene Jonken ze debattéieren. Et hu schon eng Rei Tables rondes am Land stattfund, an och op anere Plazen as diskutéiert gin. Et as awer ganz wichteg, dass mer endlech hei am Parlament iwwer dee Sujet schwätzen, debattéieren an dann och Faarf bekennen.

Säit d'Schüler jo massiv op d'Strooss gaange sin a bewisen hun, dass se wëlle gehéiert gin an dass si och eppes ze soen hun, schéngt elo endlech d'Regierung dës Kategorie vu Mënschen entdeckt ze hun. Säit 1995, no eiser Interpellatioun, ware Wäissbicher iwwer d'Jugend oder Pilotprojetë fir Jugendparlamentar schon e puermol annoncéiert gin, mä et war awer nach näischt geschitt. Eréischt

nom Streik gin déi éischt Avant-projetën iwwer Matbestëmmung vun der Jugend présentéiert oder Forummen organiséiert. Dat as bestëmmt nët ze fréi.

Ech begréissen och, dass de Minister vun der Jugend haut de Mëtteg hei as a lauschtet, wat d'Châmber zu dësem Thema ze soen huet.

Dir Dammen an Dir Hären. Déi leschté Kéier as 1972 hei zu Lëtzebuerg de Walalter erofgesat gin. Fir kënnen op e politesch Mandat gewielt ze gin, gouf deemools den Alter op 21 Jor festgeluegt. Et muss een drun erënneren, dass deemools d'Groussjäregkeet nach op 21 Jor festgeluegt war. Et bestung also eng logesch Relatioun zwëschen den allgemengen Zivilrechter an dem Recht, sech kënnen op Lëschten opsetzen ze loossen a kënnen gewielt ze gin.

Fir kënnen wielen ze goen, huet ee misse 18 Jor hun. Et huet een also 1972 och nët misse groussjäreg sin, fir kënnen dat aktiivt Walrecht auszeüben.

Mëttlerweil sin iwwer 20 Jor vergaangen an eis Gesellschaft an déi jonk Generatiounen hu sech och verännert. Dat kann engem gefalen oder nët, mä dat as nun emol e Fait, mat deem ee sech muss ausernanersetzen.

D'Erzéiung am Elterenhaus an an der Schoul huet changéiert. Si as manner autoritär gin, si setzt méi op Matbestëmmung, kritesch Ausernanersetzung mat deem, wat ronderëm ee passéiert. Déi Jonk kréien och méi perséinleche Fräiraum akkordéiert. Déi Jonk gi méi staark mat hire Virstellungen, Meinungen, Problemer oder Wënsch considéiert, a si gin als Individuum méi respektéiert, wat sech jo nët zulescht och an der Convention des Droits de l'Enfant, déi jo déi Jonk mat abegräift, nidderschleift.

D'Resultat vun all deem as, dass déi jonk Matbiirger méi e grouss Wunsch no Autonomie an Egestännegkeet hun, awer och méi interesséiert sin un der Matbestëmmung vun hirem Emfeld an der Gesellschaft.

Hei zu Lëtzebuerg huet jo dee rezente Schülerstreik dat nach eng Kéier mat grousser Däitlechkeet ënnerstrach. Déi Jonk wëllen ëm hir Meinung gefrot gin an un den Décisiounen, déi si betreffen, matschwätzen. Si sin och bereet, fir Responsabilitéiten ze iwwerhuelen. Datt se dat kënnen, hu se jo bewisen. Jidferree ka sech erënneren, wéi disziplinéiert dee Streik ofgelaf as, wéi d'Schüler sech selwer an d'Verantwortung geholl hun, a wéi se konstruktiv elo versichen u Léisungsvirschléi matzeschaffen.

Déi Disponibilitéit as eng eenzegaarteg Chance, fir se an d'Fonkionnéiere vun der Demokratie mat anzebannen, a fir se ze léieren, Verantwortung an der Gesellschaft ze iwwerhuelen.

Ech mengen, et muss ee sech virun allem virun Äen halen, dass all déi Décisiounen, déi déi Erwuessen haut huelen, Décisiounen sin, mat denen déi Jonk scho muer musse liewen. Dofir misst et nëmmen normal sin, dass mer déi Haaptbeträffe vu muer och géifen ëm hir Meinung froen an hinne Matbestëmmung erméiglechen.

Dobäi geet et nët duer, dass ee sech op sougenannt Jugendparlamentar oder Diskussionsronnen beschränkt. Ech hat schon 1995 gesot, dass esou Jugendparlamentar am Endeffekt politesch Sandkësche sin. Déi hu vläicht e pedagogesche Wäert, déi Jonk kréien en Abléck, wéi e Parlament an e Walgeschäft fonkionnéiert, si kënnen motivéiert gi fir déi politesch Geschéien. Wa mer déi Jonk awer wëllen als vollwäerteg Biirger an d'Gesellschaft integréieren, da muss een hinnen den Zougank zu denen elementaarste